

Federacija Bosne i Hercegovine obilježava dan žalosti povodom nove smrti četiri rudara u rudniku mrkog uglja Kakanj. Samo u Kakanju, u proteklih 100 godina dogodile su se četiri velike rudarske nesreće u kojima je ukupno poginulo 278 rudara, javlja Aljazeera.

Rudari Bosne i Hercegovine već godinama upozoravaju na nužnost modernizacije koja bi između ostalog doprinijela i znatno većoj sigurnosti na radu. U rudnike se desetljećima nije ništa ulagalo, a osim na fizičku sigurnost na radu, opremu, aparate za kontrolu plinskih stanja poput metanometrijske centrale, zaštitu podgrade od urušavanja potrebno je uložiti i u obrazovanje rudara, smatraju u Sindikatu rudara FBiH.

Rudnici su od 2009. godine u vlasništvu Elektroprivrede Bosne i Hercegovine koja je s vlasništvom nad rudnicima naslijedila i njihovo očajno stanje. Iz uprave Elektroprivrede kažu kako je modernizacija rudnika postala prioritet jer se ovako više ne može održavati poslovanje firme ni rad rudnika.

Uprava najavljuje trostruko poduzimanje mjera za modernizaciju rudnika. Prvo će se osigurati interventna pomoć i nabavka zaštitne opreme, odnosno osnovnih materijala u rudnicima. Činjenica da se osiguravanje temeljnih uvjeta potrebnih za rad u rudniku najavljuje kao hitna i prva mjera je možda najbolji indikator očajnog stanja u bh. rudnicima. Kao drugi korak najavljuje se nabavka opreme "za koju je ranija uprava donijela odluke" dok se kao treći korak najavljuje usvajanje trogodišnjih planova poslovanja rudnika u sustavu koncerna.

Drugi korak, nažalost potvrđuje neodgovornost i nemar vlasnika rudnika ali i optužbe sindikalista prema kojima svi dosada najavljeni koraci doista nisu bili ništa drugo nego "prazna obećanja". Treći korak nažalost daje naslutiti da ni od ova prethodna dva neće mnogo toga biti realizirano, jer EPBiH čini se, ne zna odakle bi namaknula novce i kako da isfinancira obnovu rudnika.

Za razliku od menadžmenta, Sindikat rudara FBiH je odavno iznio prijedlog "izdvajanja jednog feninga po kilovatu proizvedene električne energije u fond za razvoj i modernizaciju rudnika uglja u FBiH, a radi razvoja sigurnijih i humanijih uslova rada u rudnicima", kazao je za Klix predsjednik Sindikata rudara FBiH Sinan Husić vidno razočaran manjkom solidarnosti cijelog društva s rudarima koji su se kaže, "bezbroy puta" solidarizirali s društvom.

izvor: bilten.org